

Nayā Dil Aur Naī Ruh

Taurait : Hizakeeel 36:16-38

Allaah taa'alā kā paigāam Hizakeeel^(a.s) ko milā. Allaah taa'alā ne unse kahā: ⁽¹⁶⁾ “Ibraanī log, jo Yaaqub kī aulaadoñ me se haiñ, apnī zameen par rah rahe the, lekin unhone us zameen ko apne taur-tareeqe aur ġalat kaamoñ se gandā kar diyā. ⁽¹⁷⁾ Mere ġusse kā qahar un par tuṭā kyuñki unhone us zameen par ḳḥun bahaayā aur but parastī kī. ⁽¹⁸⁾

“Tab maine unko dusrī qaumoñ me phailā diyā aur wo dusre mulkoñ me bas gae. Maine un logoñ ko unke har ġalat kaam ke liye sazā dī. ⁽¹⁹⁾ Wo jahaan bhī gae mere paak naam kā dusrī qaum ke logoñ ke beech me mazaqa uḍwaayā. Log unko dekh kar kahte the: ‘Ye Allaah taa'alā ko maanne waale log haiñ, phir bhī usne in logoñ ko us zameen se nikaalakar baahar kar diyā jo usne inko rahne ke liye dī thī. ⁽²⁰⁾

“Mujhe apne naam kī parwaah thī kyuñki wo log jahaan bhī jaate the mere paak naam ko, dusrī qaum ke logoñ ke beech me bezzat karwaate the. ⁽²¹⁾ Isī wajah se Hizakeeel, Ibraaniyoñ se kaho, ‘Ye Allaah rabbul ālameen ne kahā hai: E Ibraaniyoñ, maiñ jo bhī karuñgā wo tumhaare liye naheen karuñgā, balki ye dikhaane ke liye karuñgā ki merā naam paak hai. Tum log jahaan bhī gae mere paak naam ko, dusrī qaum ke logoñ ke beech me bezzat kiyā hai. ⁽²²⁾

“Suno, maiñ un logoñ ke beech apne naam kī azmat dikhaauñgā; har qaum me mere naam kī bezzat tumhaarī wajah se huī hai. Maiñ unke saamne ye zaahir kar duñgā ki merā naam kitnā muqaddas hai. Maiñ unki āñkhoñ ke saamne tum logoñ kī madad karuñgā jis se unko ye yaqeen ho jaege ki tumhaarā rab kitnā azeem hai aur uske siwaay koī ḳḥudā naheen. ⁽²³⁾

“Maiñ tumheñ dusrī qaumoñ se baahar nikaal laauñgā. Maiñ tumko har mulk se baahar nikaal kar jamā karuñgā aur us zameen par waapas le kar āuñgā. ⁽²⁴⁾ Maiñ tum logoñ par saaf paanī ḳḥḍakuñgā taaki tum log paak ho jao. Maiñ tum logoñ ko butoñ kī ibaadat aur baaqī gañdagī se paak-saaf kar duñgā. ⁽²⁵⁾ Maiñ tum logoñ ko ek nayā dil duñgā aur tum me ek naī ruh phuñkuñgā. Tumhaare patthar ho chuke dil kī jagah ziñdā dil lagaauñgā. ⁽²⁶⁾

“Maiñ tum logoñ ko hidaayaat duñgā taaki tum log mere bataae hue nek raaste par chalo aur mere hukm par dhyaan se amal karo. ⁽²⁷⁾ Tum phir usī zameen par rah sakoge jo maine tumhaare buzurgoñ ko dī thī. Tab tum log mere upar īmaan rakhoge aur merī qaum hoge. ⁽²⁸⁾ Aur maiñ tumko saarī gañdagiyoñ se bachauñgā. Maiñ anaaj ko hukm duñgā ki wo zameen se nikal kar ugnā shuru ho jae aur is tarah se maiñ tum logoñ par kabhī bhukhamrī kī naubat naheen āne duñgā. ⁽²⁹⁾

“Maiñ peḍoñ par phaloñ kī aur khetoñ me anaaj kī paidaawaar baḍhā duñgā. Tumko kabhī bhī dusrī qaum ke logoñ ke saamne bhukhamrī se sharminḍā naheen honā paḍegā. ⁽³⁰⁾ Jab tum log apne haraam kaam aur ġalat chaal-chalan ko yaad karoge to tumko apne āp par bahut sharm āegī aur tum ḳḥud se nafrat karoge. ⁽³¹⁾ Suno, e Ibraaniyoñ, Allaah rabbul azeem ne kahā hai: Tum log jaan lo ki maiñ ye sab tumhaare liye naheen kar rahā huñ. To tum log apne gunaahoñ aur chaal-chalan par sharm karo. ⁽³²⁾

“Allaah taa'alā ne ye kahā hai: Jab wo din āegā, to maiñ tumko saare gunaahoñ se paak kar duñgā aur phir tum logoñ ko shaharoñ me basauñgā. Jo imaarateñ khañḍar ho gañ haiñ unko phir se banaayā jaege. ⁽³³⁾ Laawaaris zameenoñ ko phir se jotā jaege. Jab bhī log uske paas se guzareñge to usko ḳḥaalī naheen dekheñge. ⁽³⁴⁾ Wo log kaheñge: “Ye zameen barbaad kar dī gañ thī lekin ab Adan ke baaḡ jaisī hai. Ye shahar khañḍar ho gae the aur ab ye phir se ābaad aur mahafuz ho gae haiñ.” ⁽³⁵⁾ Tab tumhaare ās-paas kī qaum jaan jaeñgī ki tumhaare rab ne barbaad ho chukī cheezoñ ko phir se banaayā hai, ḳḥatm ho chukī cheezoñ ko phir se paidā kiyā hai. Ye tumhaare rab kā kalaam hai, aur maiñ aisā zarur karuñgā. ⁽³⁶⁾